

Qaffasinnerusumik ilinniagaqartunut ilinniagaqarnermi taarsigassarsiat kiisalu ataasiartumik taarsigassarsiat aningaasartaasa qaffanneqarnissaannik kiisalu ilinniagaqarnermi taarsigassarsiat ukiup affakkaartumik tunniunneqartartut qaammatikkaartunngortinneqarnissat pillugu Naalakkersuisut pisussaaffilerneqarnissaannik Inatsisartut aalajangiinissaannik siunnersuut.

(Inatsisartunut ilaasortat Knud Kristiansen aamma Siverth K. Heilmann, Atassut)

Pillugu

Kultureqarnermut, Ilinniartitaanermut, Iisimatusarnermut Ilageeqarnermullu Ataatsimiititaliap ISUMALIUTISSIISSUTAA

Siunnersuutip aappassaanneerneqarnerani Saqqummiunneqartoq

Kultureqarnermut, Ilinniartitaanermut, Iisimatusarnermut, Ilageeqarnermullu ataatsimiititaliaq kingullermik suliarinninnermini ukuninnga inuttaqarpoq:

Inatsisartunut ilaasortaq Jane Petersen, Inuit Ataqtigiit, Siulittaasoq

Inatsisartunut ilaasortaq Niels Thomsen Demokraatit, Sinniisussaq

Inatsisartunut ilaasortaq Hans Aronsen, Inuit Ataqtigiit

Inatsisartunut ilaasortaq Ruth Heilmann, Siumut

Inatsisartunut ilaasortaq Aleqa Hammond, Siumut

UKA 2011-imi inatsisartuni siullermeerlugu ulloq 18. oktober 2011 oqaluuserineqarnera kingorna Ataatsimiititaliap siunnersuut misissorpaa.

Siunnersuutip imarisai siunertaalu

Ullumikkut piffissaq ilinniarfiusoq tamakkerlugu semesterimut ataatsimut 6.000 kr-nik taarsigassarsisitsisoqartarpoq ilinniarnerullu ingerlanerani ataasiartumik 10.000 kr-nik taarsigassarsisitsisoqartarluni. Uagut Atassummi isumaqarpugut taarsigassarsiat taakku s.i. Danmarkimi ilinniagartut ilinniaqataasa atugassarisaannut sanilliullugit appasippallaartut. Taamaattumik Atassummi isumaqarpugut, nassuerutigalugu, ilinniarnerup saniatigut suliffissarsiniarnerup ajornakusuulersimanera, ilinniartut annertunerusumik taarsigassarsinissamut periarfissaqartariaqartut.

Atassutip ilanngullugu siunnersuutigaa, taarsigassarsiat siunissami qaammatikkaarlugit tunniunneqartarnissaat, maannakkutut semesterikkaarnagit .

Siunnersuutip siullermeerneqarnera

Siunnersuutip siullermeerneqarnerani partit ataasiakkaat ilaatigut imatut oqaaseqaateqarput:

Inuit Ataqtigiit

Inuit Ataqtigiit siunnersuuteqartut tunngavilersuutaannut isumaqataapput.

Siumut

Siumup siunnersuummi siunertarinqartut tapersorsorpai, kisiannili UKA2011/45-imi ilinniagaqarnersiutit pillugit siunnersuummut innersuussilluni.

Demokratit

Demokratit taamatutaaq UKA2011/45-imi ilinniagaqarnersiutit pillugit siunnersuummut innersuussivoq.

Atassut

Atassutip naalackersuisut taarsigassarsisarnermi tamatigoornerusumik aaqqiinerup qulakkeerinninissaat kissaatigaat.

Kattusseqatigiit Partiat

Kattusseqatigiit Partiat taamatutaaq UKA2011/45-imi ilinniagaqarnersiutit pillugit siunnersuummut innersuussivoq.

Naalackersuisoq siunnersuummut akissuteqarnermi ilaatigut allappoq: "Naalackersuisut ilinniagaqarnersiutit pillugit aalajangersakkanik nutarterineq ingerlassimavaat, taassumalu kingunerisaanik Inatsisartut uani katersuunneranni Inatsisissamik siunnersuuteqarlutik. Inatsisissatut siunnersuutip akuerineqareerneratigut ilinniagaqarnersiutit pillugit nalunaarutissaq nutaaq suliarineqarluni aallartinneqassaaq.

Nalunaarutissami Naalackersuisut ilinniartut siunnersuutaat aningaasatigullu taarsigassarsisinnaanerup eqaannerusunngortinnissaanut kissaatigisaat tusaaniarsimavaat. Taamaammatt Naalackersuisut semesterikkaartumik aningaasat atukkiunneqartartut, ilinniartunit ataasiakkaanit taarsigassarserusuttunit qaammatikkaartumik atorniarneqarsinnaangornissaat pilersaarutigaat. Taakku saniatigut atuagarsiniarnermut angalanermullu tapiissutit kingumut atuutileqqinnissaat pilersaarutigaat. Tamakku aalajangersulerpata ilinniartut peqatigiiffii allallu tamakkununnga nalunnginnittut qanimut suleqatigiumaneqarumaarput".

Ilanngullugulu Naalackersuisoq ilisimatitsivoq, Naalackersuisut 2012-imut Aningaasanut Inatsisissat maannakut taamatut isikkoqartillugit taarsigassarsisarnerit qaffanneqarnissaannut periarfissanik nassaarsinnaanngitsut. Kinguneranillu siunnersuut Naalackersuisunut itigartinneqartussanngorlugu inassutigineqarluni.

Ataatsimiititaliap siunnersuummik suliaqarnera

Ataatsimiititaliamit pingaartutut isigineqarpoq, aningaasatigut atugassaritinneqartut iluini nunatsinni ilinniartut atugaanik pitsaanerusemik periarfissiinnissaq. Ilinniartut, Danmarkimi Kalaallit nunaannit annertunerusemik aningaasartuuteqarfiusartumi ilinniarnissaminnut toqqaasimasut Danmarkimi S.U. -mik pisarnissaminnut pisinaatitaapput.

Ataatsimiititaliap UKA2011/45-imik ilinniagaqarnerisutit pillugit suliaqarnermut atatillugu paasisimavaa, Naalakkarsuisut allannguutissamik saqqummiussaqaarniartut, allannguutissap kingunerissallugu, ilinniagaqarnerisutit taarsigassarsisarnerlu suli Inatsisartunit Aningaasanut inatsisissaq aqputigalugu ilinniartut peqatigiiffii isumasioqatigalugit aalajangersarneqartassallutik. Ataatsimiititaliap oqaatigissavaa, aningaasat tunniunneqartartut nunatta aningaasaqarnera tunngavigalugu ingerlaavartumik nakkutigineqarnissaat isumagineqassammat.

Ataatsimiititaliap susassaqaarfimmi iluani 2012-imut Aningaasanut Inatsisissami, taarsigassarsisarnerup qaffanneqaatigisinnaasaanik nikisiterinissamut innersuussisinnaasimanngilaq.

Semesterikkaartumik taarsigassarsisarnerup Qaammatikkaarlugit tunniunneqartalernissaannik siunnersuummut Ataatsimiititaliap iluarinnippoq. Tamanna tunuliaqutaralugu Ataatsimiititaliap inassutigissavaa, Naalakkarsuisut suliamut akissuteqarnermi allagaat, imatut kinguneqassasoq *”Ilinniagaqartup qinnuteqarneratigut semesterikkaartuik taarsigassarsiarineqartartut qaammatikkaarlugit tunniunneqartarsinnaapput”* ilinniagaqarnerisutit pillugit isumaliutissiissutissamut ikkunneqarlutik. Ilinniarnerit ilaat ilinniarnermut atortussanik pisinermi semesterit aallartinneranni annertuumik aningaasartuuteqarfiusarmata paarlattuanillu ilinniarnerit ilaanni aningaasartuutit semesterinut agguataarsimasarmata taamatut oqaasertaliineq Ataatsimiititaliamit taperserineqarpoq. Taamatut oqaasertaliinermi, iliniartut nammineq qinersinnangussavaat, aningaasaliissutit sorliit imminnut naleqqunnerusut.

Siunnersuutip aningaasatigut kingunissai

Siunnersuutip piviusunngortinneqarnerani aningaasatigut kingunissat siunnersuuteqartup assersuuteqarfigai. Assersuutigalugu taarsigassarsiat semesteri ataaseq 1.000 kr.-imik qaffanneqarnerani aammalu ataasiartumik taarsigassarsiat 2.000 kr.-imik qaffanneqarnerani, Nunata Karsianit ukiumut aningaasartuutit ukioq 2012-imut ataatsimut 1.660.000 kr.-ussapput.

Ataatsimiititaliap inassuteqaatai

Tamanna tunngavigalugu **Ataatsimiititaliap isumaqatigiittup siunnersuutip itigartinneqarnissaa inassutigaa.**

Taamatut oqaaseqarluni aammalu isumaliutissiissummi oqaatigineqartunut paasinnilluni Ataatsimiititaliap siunnersuut aappassaanniigassanngortippaa.

Jane Petersen,
siulittaasoq

Niels Thomsen,
sinniisussaq

Hans Aronsen

Ruth Heilmann

Aleqa Hammond